

Inatsisartut Naalakkersuisullu pillugit Inatsisartut inatsisaat pillugu Namminersorlutik Oqartussat inatsimmut nalunaarutaat

Matumuuna Inatsisartut Naalakkersuisullu pillugit Inatsisartut inatsisaat nr. 26, 18. november 2010-meersoq, tak. inatsit pillugu nalunaarut nr. 14, 14. december 2021, Inatsisartut inarsisaat nr. 32 af 25. novembari 2022-meersumi kingunerisaanik allannguutit ilanngullugit nalunaarutigineqarpoq.

Kapitali 1

Namminersorlutik Oqartussat

§ 1. Kalaallit Nunaanni Namminersorlutik Oqartussat suliassaqarfitt tigusatik pillugit inatsisiliortutut atuutsitsinissamullu pissaaneqarput. Eqqartuussiviit, Namminersorlutik Oqartussat pilersitaat Kalaallit Nunaanni suliassaqarfinnut tamanut eqqartuussivittut pissaaneqarput. Tamanna naapertorlugu inatsisiliorneq Inatsisartuniippoq, atuutsitsineq Naalakkersuisuniilluni eqqartuussivittullu pissaaneq eqqartuussivinniilluni.

Kapitali 2

Inatsisiliortutut pissaaneq

§ 2. Inatsisartut nalinginnaasumik, toqqaannartumik isertortumillu qinersinikkut ukiunut sisamanut qinerneqartunik 31-inik ilaasortaqarput. Nutaamik qinersisoqarsimatinnagu qanorluunniit pisoqaraluarpal ilaasortaaffit annaaneqarsinnaanngillat.

Imm. 2. Inatsisartunut qinersinermut maleruagassat immikkut Inatsisartut inatsisaatigut aalajangersarneqassapput.

§ 3. Ilasortat qinigaanerisa atuuttuussusiat kiisalu ilasortaq qanoq qinigaasinnaassusiagaasinnaanersoq pillugu apeqqut Inatsisartut nammineerlutik aalajangigassaraat.

Imm. 2. Inatsisartunut ilasortap qinigaasinnaassusiagaasinnaavoq, pisumi inuup nalinginnaasumik isigineqarnermini Inatsisartunut ilasortaanermini ataqqinaataaruppat inaarausumik eqqartuussummik akiliisinneqarnermilluunniit akuersissuteqarnermik pinerluttulerinermi inatsisit tunngavigalugit pineqaatissinneqarsimaguni.

§ 4. Inatsisartunut ilasortaaneq inuiaqatigiinnit toqqagaanikkut suliassiissutitut pisussaaffiuvoq.

Imm. 2. Inatsisartunut ilasortaq tunuarniuteqarpat imaluunniit sulinngiffeqarnissamik

akuerineqaqquppat qinnuteqarneq akuerineqarsinnaanersoq Inatsisartut aalajangissavaat.

§ 5. Inatsisartut innimiginarluinnartussaapput.

Imm. 2. Inatsisartunut ilaasortat sulinermanni namminneq nalunngeqatiginnissusertik kisiat tunngavigissavaat.

Imm. 3. Inatsisartut suleriaasertik nammineerlutik aalajangersassavaat.

§ 6. Inatsisartunut ilaasortaq kinaluunniit Inatsisartuni nammineq oqaaserisaminut Inatsisartut avataanni Inatsisartut akuerinngisaannik akisussaatinneqarsinnaanngilaq.

Imm. 2. Inatsisartunut ilaasortaq kinaluunniit, iliuuseqarnermini pakasarneqarsimanngippat, Inatsisartut akuersisimatinnagit unnerluutigineqarsinnaananilu qanorluunniit ittumik kiffaanngissusiiarneqarsinnaanngilaq.

§ 7. Inatsisartut nutaamik qinersinerup kingornatigut sapinngisamik piaartumik kingusinnerpaamillu ullut 45-t qaangiutsinnagit katersuutissapput. Ataatsimiigiaqqusisuussaaq ilaasortaq sivisunerpaamik Inatsisartunut ilaasortaasoq imaluunniit ilaasortat arlallit sivisoqatigiimmik ilaasortaasimappata angajulleq. Qinigaanerup nalilerneqarnissaata aammalu Inatsisartut Siulittaasoqarfiannik qinersisoqarnissaata tungaanut ilaasortap taassuma Inatsisartut ataatsimiinneri aqussavai.

§ 8. Inatsisartut aalajangiisinnaassuseqarput ikinnerpaamik ilaasortat affaat najuuppata.

Aalajangiisoqartarpoq aalajangiineq taasisunit ilaasortat najuuttut affaannit amerlanerusunit taperserneqarpat.

Imm. 2. Inatsisartut Siulittaasoqarfiaita suliaq kinguartinneqarsinnaannngitsutut nalilerpagu, Inatsisartut imm. 1 apeqqutaatinnagu elektroniskimik ataatsimiissinnaapput

§ 9. Inatsisartuni ataatsimiinnerit tamanut ammasuupput. Taamaattorli Inatsisartut isumaqatigiissutigisinnaavaat suliassat atasiakkat matoqqasumik ataatsimiinnermi oqaluuserineqarnissaat. Suliassap matoqqasumik ataatsimiissutigisariaqneranik apeqqut matoqqasumik ataatsimiinnermi isumaqatiginnnniutaassaaq, taamaaliornissaq Inatsisartunit imaluunniit ataatsimiinnermi aqutsisumit aalajangerneqarpat.

Imm. 2. Inatsisartuni isumaqatiginnnniarterit kalaallisut ingerlanneqassapput. Inatsisartunut Naalakkersuisunullu ilaasortat kalaallit oqaasiinik atuinngitsut danskisut oqalussinnaatitaapput, oqaasiilu kalaallisuumut nutserneqassallutik taamatuttaarlu isumaqatiginnniarterit danskisut aamma malinnaaffigineqarsinnaassallutik.

Imm. 3. Inatsisartut isumaqatiginnniutaat taakkununngalu ilanngussat tamanut saqqummiunneqartassapput kalaallisut danskisullu.

Imm. 4. Naalagaaffiup Siniisaa Inatsisartut tamanut ammasumik ataatsimiinnerini najuuffiginnnissamik pisinnaatitaavoq.

§ 10. Inatsisartut katersuuttassapput Inatsisartut siulittaasuata pisariaqartitsisorineratut akulikitsigisunik, taamatullu aamma katersuuttassallutik Naalakkersuisut siulittaasuata imaluunniit Inatsisartunut ilaasortat ikinnerpaamik affaasa tamanna piumasarigaangassuk.

Imm. 2. Inatsisartut ileqquusumik katersuunnermi aalajangissavaat Inatsisartut tullianik ileq-quusumik katersuunnissaannut piffissaq ataatsimiiffiusussaq.

§ 11. Inatsisartut Siulittaasoqarfiaata ataatsimiinnissaq sioqullugu Inatsisartut ilaasortaannut, Naalakkersuisunut Naalagaaffiullu Siniisuanut oqaluuserineqartussatut naatsorsuutigineqartut nalunaarsorneri nassiuressavai. Nalunaarsuutit tamanut saqqummiunneqassapput.

§ 12. Inatsisartunut ilaasortaq pisortat suliassaataat pillugu paasissutissinneqarnissaminik kissaateqarpat, tamanna Naalakkersuisunut apeqquteqarnikkut pisinnaavoq.

Imm. 2. Naalakkersuisut apeqqummut akissuteqarnissaminut pisussaaffeeqanngillat:

- 1) Naalakkersuisut paasissutissanik akissuteqarnissaminut atugassaminnik pissarsisinnaangippata,
- 2) malunnartumik piffissaq nukissallu paasissutissanik akissuteqarnissamut atugassanik pissarsiniarnermut atortariaqassappata, imaluunniit
- 3) paasissutissat kissaatigineqartut nipangiussisussaatitaanermut ilaatinneqarpata.

§ 13. Inatsisartut inatsisissaattut, inatsisartut peqqussutissaattut aalajangiiffigisassanillu allanik siunnersuutinik Inatsisartunut Naalakkersuisunullu ilaasortaq kinaluunniit saqqummiussisinnaavoq.

Imm. 2. Kalaallit Nunaannut sunniutilinnik inatsisissatut naalagaaffiilluunniit isumaqtigiissutissaattut danskit naalakkersuisusa siunnersuutaat Inatsisartut aalajangiiffigisassaaattut siunnersuutit Naalakkersuisunit saqqummiunneqartassapput.

§ 14. Inatsisartut inatsisissaattut siunnersuutit inatsisitut ilusilerlugit saqqummiunneqassapput Inatsisartunilu pingasoriarlugit suliarineqassallutik.

§ 15. Naalakkersuisut ukiumi ukioq aningaasanut inatsiseqarfusoq sioqullugu kingusinnerpaamik novembarip ulluisa 15-ianni inaarutaasumik akuersissuteqarnissaq siunertaralugu ukiumut aningaasanut inatsiseqarfiusumut tulliuttumut Inatsisartut aningaasanut inatsisissaattut siunnersuut saqqummiutissavaat.

§ 16. Inatsisartut Aningaasaqarnermut Ataatsimiitaliaat Naalakkersuisut aningaasanut inatsisissatut siunnersuutaata siullermeelugu aappassaaneerlugulu oqaluuserineqarnerata akornanni nunap karsianut missingersuutit siunnersuutit pillugit isumaliutissiissuteqassaaq, Inatsisartut isertitanut- aamma aningaasartuutinut politikkikkut ingerlatsinerannut najoqqtassianut pingarernut oqaaseqarfiginnillunilu siunnersuuteqassalluni kiisalu suliassani Inatsisartunit Naalakkersuisunilluunniit ataatsimiitaliamut innersunneqarsimasuni Inatsisartut sinnerlugit oqaaseqartassalluni.

Imm. 2. Inatsisartut Aningaasaqarnermut Ataatsimiitaliaata siunertanut aningaasartuutaasussat aningaasanut inatsisip akuersissutigineqarnerani siumut naatsorsuutigineqarsimangitsut Inatsisartut sinnerlugit akuersissutigisinnavaai. Tamanna pillugu Inatsisartunut Inatsisartullu Ombudsmandianut aningaasartuutaasussat siunertanut aningaasanut inatsisip akuersissutigineqarnerani siumut naatsorsuutigineqarsimangitsunut tunngatillugu aningaasartuutaasussat Inatsisartut sinnerlugit Suleriaaseq pillugu Ataatsimiitaliamit akuersissutigineqarsinnaapput, inatsisartut ataatsimiinginneranni.

Imm. 3. Inatsisartut Aningaasaqarnermut Ataatsimiitaliaata aningaasartuutissatut akuersissutai

ukumoortumik ilassutitut aningaasaliissutinut inatsimmi, ukiumi aningaasanut inatsiseqarfiusumi tulliuttumi Inatsisartut ileqqusumik siullermeerlutik ataatsimiinneranni oqaluuserineqartussami, katersorneqassapput.

Imm. 4. Naalakkersuisut aningaasanut inatsisip suliainerani missingersuusiornermi maleruagassanik malittarisassat aalajangersassavaat.

§ 17. Aktiaateqarluni ingerlatseqatigiiffinni Namminersorlutik Oqartussanit tamakkiisumik ilaannakuusumilluunniit pigineqartuni aningaasaliinissamik qularnaveeqqusiiinissamilluunniit allatulluunniit aningaasatigut iluaqsiinissanik pingaarutilinnik siunnersuutinik qinnuteqaatinilluunniit ataatsimiitaliap suliainerani atugassatut ingerlatseqatigiiffimmit pineqartumit, pisariaqarpak aktiaateqarluni ingerlatseqatigiiffit pillugit inatsimmi ingerlatseqatigiiffilluunniit malittarisassaanni periarfissiissutaasut atornerisigut, paassisutissanik erseqqinnerusumik nalunaakkanik pissarsiniarnissamik Inatsisartut Aningaasaqarnermut Ataatsimiitaliaata Naalakkersuisut peqqusinnaavai. Ataatsimiitaliap kaammattuineratigut paassisutissat Naalakkersuisut pissarsiatik kinguarsaanertaqanngitsumik ataatsimiitaliamut atugassanngortissavaat.

Imm. 2. Paassisutissat ataatsimiitaliamit pisariaqartutut nalilerneqartut tigunissaasa tungaanut siunnersuutinik qinnuteqaatinilluunniit imm. 1-im taaneqartunik suliainerannini ataatsimiitaliap unitsikkallarsinnaavaa.

Imm. 3. Paassisutissat isertuussassatut tunniunneqarsimappata ataatsimiitaliamit ilaasortat allallu ataatsimiitaliap oqaluuserinninnerani najuuttut imm. 1 naapertorlugu ataatsimiitaliamit ilisimalikkaminnik isertuussinissaminut pisussaatitaapput. Nutaatut ilaasortanngortoq kinaluunniit pisussaaffimmik tamatuminnga eqquutsitsinissamik uppernarsaalluni atsiussaaq.

§ 18. Kukkunersiuinermut Ataatsimiitaliap Nunatta Karsiata naatsorsuutai kukkunersiuisullu taakkununng oqaaseqataat ukiut ataasiarluni misissortassavai, naatsorsuutillu pisariaqalersitaannik Naalakkersuisunut apeqquteqarlunilu oqaaseqarfinginnittassalluni. Ataatsimiitaliap apeqqutai oqaaseqataalu Naalakkersuisut akissutaat ilanngullugit Inatsisartunut saqqummiunneqartassapput.

Imm. 2. Ataatsimiitaliaq qaqugukkulluunniit uku pillugit misissuinernik aallartitsisinnaavoq oqaluuserinnissinnaalluniluunniit:

- 1) aningaasat aqunneqarneranni suliffeqarfiallu naatsorsuutinut ilaatinneqartut ingerlanneqarne-ranni aningaasanut tunngasutigut isiginagiassat naapertuuttumik isiginiarneqarsimanersut, aamma
- 2) iliuutsit naatsorsuutit saqqummiunneqarnerinut ilaatinneqartut aningaasaliissutinut nalunaarutigineqartunut, inatsisinut najoqqulassianullu allanut kiisalu isumaqatigiissutinut isumaqatigiissutigineqarsimasunut nalinginnaasumillu suleriaatsimut naapertuuttuunersut.

Imm. 3. Ataatsimiitaliap sapinnigisamik piaarnerpaamik Naalakkersuisut periarfississavaat nassuaatit, nalunaarusiat immikkullu ilisimasalinnit naliliinerit il.il. ataatsimiitaliap imm. 2 malillugu pissarsiarisimasaasa oqaluuseriniarlugilluunniit aalajangersimasaasa oqaaseqarfinginissaannut.

Imm. 4. Ataatsimiitaliaq, ataatsimiitaliap tamanna pisariaqartippagu, Nunatta Karsiata naatsorsuutai pillugit isumaliutissiissuteqarnissaq utaqqinngikkaluarlugu ingerlatsinermik misissuineq imm. 2-mut ilaatinneqartoq pillugu Inatsisartunut ilisimatitsissuteqarsinnaavoq.

Imm. 5. Ataatsimiitaliap qinnuteqarneratigut, paassisutissat atortussallu suugaluartulluunniit imm. 1-2 tunngavigalugit ataatsimiitaliap suliassaanik ataatsimiitaliap isumaginninneranut pingaarutillit,

Naalakkersuisut nalunaarutigisassavaat tunniuttassallugillu.

Imm. 6. Ataatsimiititaliamut ilaasortap ikinnerpaamik ataatsip tamanna piumasarippagu imm. 5 malillugu paasissutissanik atortussanillu ataatsimiititaliaq pissarsiniassaaq.

§ 19. Namminersorlutik Oqartussat aktiaatilitut soqtigisaannik Naalakkersuisut qanoq isumaginninnerat Kukkunersiuinermut Ataatsimiititaliap taamatuttaaq nakkutigissavaa.

Imm. 2. Aktiaateqarluni ingerlatseqatigiiffit Namminersorlutik Oqartussanit tamakkiisumik ilaannakuusumilluunniit pigineqartut ingerlanneqarneranni aningaasaqarnikkut innimigisassanik Naalakkersuisut naammattumik annertussuseqartumik qulakkeerinninniarsimanersut ataatsimiititaliap imm. 1 naapertorlugu nakkutilliinerminut ilaatillugu nalilersorsinnaavaa.

Imm. 3. Aktiaateqarluni ingerlatseqatigiiffinni Namminersorlutik Oqartussanit tamakkiisumik ilaannakuusumilluunniit pigineqartuni Namminersorlutik Oqartussat aktiaatilitut soqtigisaannik ataatsimiititaliap nakkutilliinermini atugassatut ingerlatseqatigiiffimmit, pisariaqarpak aktiaateqarluni ingerlatseqatigiiffit pillugit inatsimmi ingerlatseqatigiiffiulluunniit malittarisassaani periarfissiissutaasut atornerisigut, paasissutissanik erseqqinnerusumik nalunaakkanik pissarsiniarnissamik Naalakkersuisut peqqusinnaavai. Ataatsimiititaliap kaammattuineratigut paasissutissat Naalakkersuisut pissarsiatik kinguarsaanertaqanngitsumik ataatsimiititaliamut atugassiissutigissavaat.

Imm. 4. Ataatsimiititaliami ilaasortaq kinaluunniit aalajangiiffisassatut siunnersummik Inatsisartut aalajangiiffisassaannik imm. 2-3-lu naapertorlugin saqqummiussisinnaavoq. Inatsisartunut ilaasortat ikinnerpaamik 2/5-liisa siunnersuut isumaqatigalugu taasippata siunnersuut akuersissutigineqartutut isagineqassaaq. Siunnersummut allannguutissatut siunnersummik saqqummiussisoqarsinnaanngilaq.

Imm. 5. Paasissutissat isertuussassatut tunniunneqarsimappata ataatsimiititaliami ilaasortat allallu ataatsimiititaliap oqaluuserinninnerani najuuttut imm. 1 naapertorlugu ataatsimiititaliami ilisimalikkaminnik isertuussinissaminut pisussaatitaapput. Nutaatut ilaasortanngortoq kinaluunniit pisussaffimmik eqquutsitsinissamik upternarsaalluni atsiussaaq. Pissutnik Namminersorlutik Oqartussat aktiaatilitut soqtigisaannut tunngasunik Inatsisartut ilisimatitsissuteqarfingineqarnissaat ataatsimiititaliap pisariaqartutut isigiguniuk ataatsimiititaliaq immikkullarissumik isumaliutissiissuteqassaaq. Isumaliutissiissut paasissutissanik isertuussassanik imaqarpak matoqqasumik ataatsimiinnermi suliarineqassaaq.

§ 20. Inatsisartut Ombudsmandimik qinersisassapput Inatsisartut sinnerlugit Namminersorlutik Oqartussat kommunillu ingerlatsinerannik malinnaasussamik. Ombudsmandi inatsisartunut ilaasortaasinnaanngilaq inatsisilerituutullu ilinniarsimasuussalluni.

Imm. 2. Ombudsmandi Inatsisartunit tatigineqarunappat Inatsisartut soraarsissinnaavaat.

Imm. 3. Ombudsmandip sulinera Inatsisartut Inatsisit Atortinneqarnerannut Ataatsimiititaliaata ingerlaavartumik malinnaavigissavaa. Ombudsmandi ingerlatani pillugit ukumoortumik nalunaarummik Inatsisartunut saqqummiussisassaaq.

Imm. 4. Ombudsmandip pissutsit atugarisai erseqqinnerusut immikkut Inatsisartut inatsisaatigut aalajangersarneqassapput.

Kapitali 3

Nunanut allanut sillimaniarnermullu tunngasut

§ 21. Inatsisartut Nunanut Allanut Sillimaniarnermullu Ataatsimiititaliaata nunanut allanut sillimaniarnermullu pissutsit Naalakkersuisuneersut suliassarai taakkununngalu attuumassuteqartunut sammisamut apeqquteqarsinnaallunilu oqaaseqaateqarsinnaavoq. Ataatsimiititaliap suliassaqarfimmini ineriarornermut malinnaalluarnissani pisussaaffigaa.

Imm. 2. Nunanut Allanut Sillimaniarnermullu Ataatsimiititaliami ilaasortat allallu ataatsimiititaliami oqallittoqarnerani peqataasimasut paassisutissanik ataatsimiititaliami paasineqarlutik paassisutissanik isertuussanik danskit naalakkersuisuinit Naalakkersuisuniillu tunniunneqartunik aammalu ataatsimiititaliap siulittaasuata tamakku saniatigut aalajangigaanut isertuussinissamik pisussaaffeqarput. Kinaluunniit ilaasortaq nutaaq aalajangersagaq taanna malinniarlugu inatsisinik malinninniarluni allakkatigut uppernarsaalluni atsiortinneqassaaq.

Kapitali 4

Atuutsitsisutut pissaaneq

§ 22. Naalakkersuisunut ilaasortat Inatsisartunit taakku qinigaaffiannut atuuttumik qinerneqassapput.

Imm. 2. Naalakkersuisut siulittaasuat Inatsisartunut ilaasortat akornannit qinerneqassaaq.

Imm. 3. Naalakkersuisut siulittaasuat Naalakkersuisunut ilaasortanik qinigassanik amerlassusilikkanik aqqisigut taasanik Inatsisartunut inassuteqassaaq. Naalakkersuisunut ilaasortassanik qinersineqassaaq siulittaasup siunnersuutaata ataatsimut taassisutigineratigut.

Imm. 4. Naalakkersuisunut ilaasortaq Inatsisartunut ilaasortaanngitsoq Inatsisartunut qinigaasinnaaneq pillugu aalajangersakkanik sukkulluunniit atuuttunik eqquutsitsissaaq.

Imm. 5. Naalakkersuisunutilaasortaaneq inuiaqatigiinnit toqqagaanikkut suliassiissutitut pisussaaffiuvoq.

Imm. 6. Naalakkersuisunut ilaasortat ataasiakkaat akisussaatinneqartarnerat Inatsisartut inatsisaatigut immikkut aalajangersarneqassaaq.

§ 23. Naalakkersuisut siulittaasuata Naalakkersuisunut ilaasortat akornanni Naalakkersuisut suliassaqarfii agguataassavai.

Imm. 2. Naalakkersuisut siulittaasuata Inatsisartunut nalunaaruteqarnermigut Naalakkersuisunut ilaasortaq qinikkatut atuuffianit atuukkunnaarsissinnaavaa, § 27, imm.1 naapertorlugu ilaasortap Inatsisartunit atuukkunnaarsinnejneratulli sunniuteqartumik.

§ 24. Naalakkersuisunut ilaasortaq peqqiillornerminik assigisaanilluunniit pingaarutilimmik pissuteqarluni sulinngiffeqartitaanissaminik qinnuteqaateqarpat Naalakkersuisut siulittaasuata qinnuteqaat akuerineqarsinnaanersoq aalajangissavaa.

Imm. 2. Naalakkersuisunut ilaasortaq naalakkersuisunit tunuarniuteqarluni qinnuteqarpat Inatsisartut qinnuteqaat akuerineqarsinnaanersoq aalajangissavaat.

Kapitali 5

Atuuffinnik allanik tigummisaqarneq

§ 25. Inatsisartut siulittaasuat, Naalakkersuisut siulittaasuat Naalakkersuisuniluunniit ilaasortaq invertinneqarnermi nalaani allanik atuuffeqartoq inuussutissarsiuteqartorluunniit taakkunannga tunuassaaq.

Imm. 2. Inatsisartut siulittaasuata, Naalakkersuisut siulittaasuata Naalakkersuisuniluunniit ilaasortap atuuffit inuussutissarsiutilluunniit taakku ingerlatiinnarumallugit kissaatigippagu Qinersinerup Misilinnejarnissaanut Ataatsimiititaliaq tamanna pillugu erngerluni nalunaarfigissavaa. Nalunaarutip tiguneneraaniit sapaatip akunneri pingasut qaangiutinnginnerini pineqartup atuuffimminik inuussutissarsiumminilluunniit taamaattunik ingerlatsiinnarnissaa ataatsimiititaliap itigartitsissutigisinhaavaa.

Imm. 3. Inatsisartut siulittaasuata imm. 2-mi piffissaliussap naanerata kingorna atuuffit inuussutissarsiutilluunniit sorliit siulittaasup ingerlatiinnarsinnaanerai Inatsisartunut nalunaarutigissavaa. Naalakkersuisut siulittaasuata atuuffit inuussutissarsiutilluunniit sorliit Naalakkersuisut siulittaasuata Naalakkersuisunullu ilaasortat ingerlatiinnarsinnaaneraat Inatsisartut siulittaasuanut nalunaarutigissavaa.

Imm. 4. Inatsisartut siulittaasuat, Naalakkersuisut siulittaasuat Naalakkersuisunilu ilaasortat atuuffinnik inuussutissarsiutinilluunniit pineqartunik ingerlatsinermik saniatigut atuuffinnik inuussutissarsiutinilluunniit nutaanik Qinersinerup Misilinnejarnissaanut Ataatsimiititaliaq akuersereersimatinnagu tiguseqquaanngillat.

Kapitali 6

Inatsisartunut nutaamik qinersineq aamma Naalakkersuisunik atuukkunnaarsitsineq

§ 26. Naalakkersuisut siulittaasuat piffissap qinigaaffiup atuuffiata naannginnerani Inatsisartunut nutaamik qinersinissamik nalunaaruteqassaaq.

§ 27. Naalakkersuisut siulittaasuat imaluunniit Naalakkersuisunut ilaasortat ataasiakkaat Inatsisartunit tatigineqarunnaarpata Naalakkersuisut Inatsisartunit atuukkunnaarsinnejqarsinnaapput.

Imm. 2. Naalakkersuisut siulittaasuat atuukkunnaarsinnejqarpata Naalakkersuisut ataatsimoorlutik atuukkunnaassapput.

§ 28. Naalakkersuisut siulittaasuat § 27 naapertorlugu Naalakkersuisunut ilaasortamik imaluunniit Naalakkersuisunik tamarmiusunik Inatsisartut atuukkunnaarsitsisimappata Inatsisartunut nutaamik qinersisoqassasoq ingerlaannartumik nalunaaruteqarsinnaavoq.

§ 29. Naalakkersuisut atuukkunnaarsinnejqarpata imaluunniit soraarnissaq qinnutigippassuk imaluunniit nutaamik qinersinissaq nalunaarutigineqarpata, Naalakkersuisut nutaat qinernejarnissaasa tungaanut Naalakkersuisut atuukkallassapput. Naalakkersuisuugallartut atorfimmi suliassat ingerlaannarnissaannut pisariaqartunik taamaallaat suliaqarsinnaapput.

Kapitali 7

Inatsisartut inatsisaasa il.il. atuuttutut atsiorneqartarnerat atuutilersinnejqartarnerallu

§ 30. Inatsisartut inatsisissaattut siunnersuut akuersissutigineqartoq atuutilersinnaassaguni inaarutaasumik akuersissutigineqarnermi kingorna kingusinnerpaamik sapaatit akunneri sisamat qaangiutsinnagit Naalakkersuisut siulittaasuannit atuuttutut atsiorneqarsimassaaq.

Imm. 2. Siunnersuutip ataatsimiinnermi tullermi Inatsisartunit akuersissutigineqarnissaata tungaanut siunnersuutip inaarutaasumik akuersissutigineqarnerata kingorna ulla arfineq-pingasut ingerlaneranni Naalakkersuisut aalajangersinnaavaat atuuttutut atsiorneqarnissaa kinguartinneqassasoq.

Ataatsimiinnermi maani siunnersuut allannguiteqartinnagu akuerineqarpat atorunnaassaaq.

Imm. 3. Aningaasaliissutinut inatsisaagallartumik imaluunniit nutaamik qinersisoqarnis-saanik inatsimmik atuuttutut atsiuinissaq Naalakkersuisut kinguartissinnaanngilaat.

§ 31. Inatsisartunit inatsisit Namminersorlutillu Oqartussat nalunaarutaat allamik aalajangiisoqarsimanngippat atuutilertarput Inatsisartunit inatsisip Namminersorlutilluunniit Oqartussat nalunaarutaasa ulloq taanna atuutilersutut nalunaarsimanerata kingorna ulloq aallartikkaangat.

Imm. 2. Tamanut saqqummiussineq qarasaasiat atorlugit pisassaaq. Naalakkersuisut tamanut saqqummiussisarnermut maleruagassanik aalajangersaassapput.

Imm. 3. Inatsisartut inatsisaat, Inatsisartut peqqussutaat imaluunniit Namminersorlutik Oqartussat nalunaarutaat tunngavigalugit kommunit maleruaqqusaliaannut tunngatillugu imm. 1 aamma 2 taamatuttaaq atuupput.

Kapitali 8

Atuutilerfia

§ 32. Inatsisartut inatsisaat manna 1. december 2010-mi atortuulerpoq. Inatsisartut Naalakkersuisullu pillugit Inatsisartut inatsisaat nr. 11, 20. oktober 1988-imeersoq tamatumunnga peqatigitillugu atuukkunnaarsinnejarpooq.

Imm. 2. Inatsisartut Naalakkersuisullu pillugit Inatsisartut inatsisaat nr. 11, 20. oktober 1988-imeersoq tunngavigalugu malittarisassatut aalajangersarneqartut malittarisassanit Inatsisartut inatsisaat manna tunngavigalugu aalajangersarneqartunit taarserneqarnissamik atorunnaarsinnejarnissamilluunniit tungaanut atuutissapput.

Inatsisartut inatsisaat nr. 12, 29. november 2013-meersoq (Qarasaasiat atorlugit tamanut saqqummiisarneq)^[i] atuutsitsilernissamut aalajangersaq una imaraa:

§ 2

Inatsisartut inatsisaat manna 1. januar 2014 atuutilissaaq.

Inatsisartut inatsisaat nr. 30, 9. december 2015-imeersoq (§ 25, imm. 3-p, aamma § 31, imm. 1-ip kalaallisoortaani inatsisip allassimanerata naqqinneqarnera)^[ii] atuutsitsilernissamut aalajangersaq una

imaraa:

§ 2

Inatsisartut inatsisaat januaarip 1.-ni 2016-imí atuutilissaaq.

Inatsisartut inatsisaat, nr. 2, 29. maj 2020-meersoq (Naalakkersuisunut apeqqutit)^[iii] atuutsitsilernissamut aalajangersaq una imaraa:

§ 2

Inatsisartut inatsisaat ulloq 1. juli 2020 atuutilissaaq.

Inatsisartut inatsisaat nr. 4, 19. november 2021-meersoq (Kukkunersiuinermut Ataatsimiititaliap piginnaatitaanera aamma paassisutissanik atortussanillu piumasaqarsinnaatitaanera)^[iv] atuutilersitsinissamik aalajangersagaq makkuninnga imaqarpoq:

§ 2

Inatsisartut inatsisaat ulloq 1. januar 2022 atuutilerpoq.

Inatsisartut inatsisaat nr. 32, 25. novembari 2022-meersoq (Inatsisartut elektroniskimik ataatsimiittarnissaannut periarfissaq)^[v] atuutilersitsinissamik aalajangersagaq makkuninnga imaqarpoq:

§ 2

Inatsisartut inatsisaat ulloq 1. januar 2022 atuutilerpoq.

Naalakkersuisut Siulittaasuata Naalakkersuisoqarfia, ulloq 4. apríili 2023

Hans-Peder Barlach Christensen (atsior.)
Naalakkersuisut Siulittaasoqarfiani Pisortaq

/ Jógván Svabo Samuelsen (atsior.)

- [i] Inatsimmi allanngortinneqartumi pineqarput § 31.
- [ii] Inatsimmi allanngortinneqartumi pineqarput § 25, imm. 3 aamma § 31, imm. 1.
- [iii] Inatsimmi allanngortinneqartumi pineqarput § 12.
- [iv] Inatsimmi allanngortinneqartumi pineqarput §§ 18 aamma 19.
- [v] Inatsimmi allanngortinneqartumi pineqarput § 8, imm. 2.

Namminersorlutik Oqartussat

Imaneq 4
3900 Nuuk
E-mail: nsninatsit@nanoq.gl

Linkit iluaqutaasussat

Kalaallit Nunaanni inatsisinut nalunaarutit
Namminersorlutik Oqartussat inatsisinut toqqorsiviit
Naalakkersuisut